

**Տ. ՎՐԹԱՆԵՍ ԵՊԻՍԿՈՊՈՍ ԱԲՐԱՀԱՄՅԱՆԻ ՔԱՐՈԶԸ՝
ԽՈՍՎԱԾ Ս. ԷԶՄԻԱԾՆԻ ՄԱՅՐ ՏԱՃԱՐՈՒՄ
ՀԱՅՈՑ ԲԱՆԱԿԻ ԿԱԶՄԱՎՈՐՄԱՆ
23-ՐԴ ՏԱՐԵՂԱՐԶԻ ԱՌԻԹՈՎ**

(25 հունվարի, 2015 թ.)

Յանուն Հօր եւ Որդւոյ եւ Հոգւոյն Սրբոյ, ամէն:

«Ո՛ր արար զհրեշտակս իւր հոգիս,
եւ զպաշտօնեայս իւր՝ բոց հրոյ»
(Եբր. Ա. 7):

Աստծո ստեղծագործության ընթացքը ցույց է տալիս, եւ նրա հայտնությունն ասում, որ մարդն է Աստծո արարածների կենտրոնը, գլուխն ու նպատակը: Սա է պատճառը, որ նախ բոլոր արարածները ստեղծվեցին, ապա՝ նոր մարդը, որ պատկերն է Աստծո, իսկ նրա կյանքի մեջ տեսանելի է ամբողջ աշխարհը: Մարդու այս մեծ նշանակությունն առավել եւս բարձրանում է, երբ նկատում ենք, որ նրա համար են ստեղծված մինչեւ անգամ հրեշտակները, որոնք ստեղծվել են արարչության առաջին օրը՝ լույսի հետ, ի սպասավորություն փրկությունը ժառանգողների: Լինելով երկնաբնակ՝ նրանք իրենց մասնակցությունն են բերում երկրավոր կյանքի ընթացքին եւ գործում են ժամանակի ու տարածության մեջ կենցաղավարող մարդու հետ եւ մարդու համար:

Միրելիներ, լինելով անդրանցական ոլորտի բնակիչներ՝ հրեշտակները հանդես են գալիս որպես Աստծո երկնային հրեղեն բանակներ եւ ունեն իրենց գորագլուխ ղեկավարները՝ ի դեմս Գաբրիելի, Միքայելի, Ռաֆայելի եւ Սուրբ Գրքում հիշվող այլ առաջնորդ հրեշտակապետերի:

Մարդկային մեր կյանքում ամեն հաջողված կառույց առաջ է եկել երկնային համանման իրականությանը հետեւելու արդյունքում: Դրա վառ օրինակներից են Եկեղեցին, պետությունը, իսկ դրա մեջ՝ բանակը: Այդ կառուցվածքն առավել ակնառու է բանակի պարագային, քանի որ կրկնում է երկնային նվիրապետությունը եւ դրանց մեջ՝ «անմարմին գոյացությունների» երկնաքաղաքացի զվարթունների գործառույթների զգալի մասը, ինչի արդյունքում մեծագույն հաջողություններ է արձանագրել, քանի որ հիմքում ունեցել է կա-

տարելատիպը: Քրիստոնեությունն ընդունելուց ի վեր, երբ հայոց արքան, գորքն ու ամբողջ ազգը մկրտվեցին Արածանիի ջրերում, հայ զինվորը մարտի էր գնում մկրտված, մեղքերի թողություն եւ Ս. Հաղորդություն ստացած՝ պատրաստ կռվելու մինչեւ վերջ եւ կյանքը գոհաբերելու հավատի, հայրենիքի եւ ազգի ապագայի համար:

Սիրելիներ, Աստված ազգերին կամք է շնորհի անում՝ ունենալու բանակ, պետականություն եւ եկեղեցի, եթե ազգերն իրենց գիտակցության մեջ ունենում են սրբության գաղափար: Նման ազգերին առիթ է ընձեռվում կերտելու նվիրական արժեքներ՝ համաձայն Աստվածային կամքի, ինչպես որ եղավ հայոց ժամանակակից բանակի կայացման պարագայում: Նվիրյալ հայորդիների ջանքերով, որ մարտնչում էին իբրեւ շարքային զինվոր ու աշխարհագոր, եւ Եկեղեցու օրհնությամբ՝ բազում կորուստներով ու անպատմելի հաղթանակներով կայացավ մեր բանակը, որն ամբողջ հայ ազգի համար դարձավ մի տեսակ տապան, որ փրկեց ու պաշտպանեց հայրենիքը պատերազմի արհավիրքներից ու նենգ թշնամուց:

Նորաստեղծ բանակն Աստված վերօրհնեց հաղթանակներով: Բազում նվիրյալների արյամբ շաղախվեց վերածնունդի շաղախը, որը միավորեց հայությանը՝ Մայր Հայաստանում ու Արցախում: Նորաստեղծ մեր բանակը կանգնեց այդ հողի եւ նրա արդար մշակի պաշտպանության դիրքերում, բազում մարտեր մղեց եւ ամեն անգամ մարտի դաշտից դուրս եկավ հաղթանակած՝ եռագույնն ու Տիրոջ խաչը վեր պարգած: Սա վկայություն էր համայն աշխարհին, որ հայ հողի համար պայքարողը հրեշտականման հայ զինվորն է, ով մարտի է բռնվում՝ լի առ Աստված հավատով եւ հայրենիքի հանդեպ տաժաժժ որդիական պարտքի խորը զգացումով: Հայրերից ժառանգած հավատը, ուժն ու կորովը, հայրենիքի հանդեպ ունենցած սերը շարունակում են արգելք լինել նահանջի ճամփին, արգելք՝ պարտության առաջ՝ պարտադրելով չսված հաղթանակներ, որոնք պետք է իրենց արժանի տեղն ունենան ռազմարվեստի պատմության դասագրքերում: Դրանք պետք է ավելացնեն այն հերոսապատումները, որոնցով հայ մանուկը սովորում է դեռեւս մայրական գրկում ու մեծանում:

Այո՛, Հայկի ամրոցի, Արամի տան, քաջարի արմենների ու նրանց ներկայիս հետնորդների մասին ազգերը հիացումով են խոսում: Երբեմն կանոնավոր բանակով, երբեմն աշխարհագորով, երբեմն փոքրիկ ջոկատներով կամ էլ ֆիդայական շարժումներով կարողացել ենք պաշտպանել մեր հայրենի հողը, Մայր եկեղեցին, մեր լեզուն ու պատիվը: Բոլոր այն զինվորները, ում երկրային կյանքն ավարտվել է հենց մարտի դաշտում, պահապան հրեշտակների ուղեկցությամբ միացել են երկնային գործերին, որպես հաղթանակած եկեղեցի, իրենց մարտը շարունակելու աներեւույթ մարտադաշտում ու չարի դեմ պայքարը հասցնելու տեսական ավարտին ու փառքին:

Չնայած այն հանգամանքին, որ Աստվածաշնչում ուղղակի կերպով չի նշվում, որ ամեն մարդ Աստծո կողմից օժտված է պահապան հրեշտակ ունենալու շնորհով, սակայն սուրբգրային բազում տեղիներ մեզ ուղղակի եւ անուղղակի կերպով հուշում են, որ երկնային գործերը մարդու կողքին են՝ վառ պահելու այն լույսի հատիկը, որ Աստված դրեց մարդ արարածի մեջ: Երեք կարգավետությունների բաժանված հրեշտակների ինը դասերի հայտնութենական պաշտոններից մեկը յուրաքանչյուր ադամորդու եւ հատկապես արդարներին հովանավորելն ու պահպանելն է: Ըստ հրեական ավանդության՝ յուրաքանչյուր ազգ ունի իր պահապան հրեշտակը: Դանիել մարգարեն իր գրքում ակնարկում է հույների եւ պարսիկների հրեշտակների մասին: Այս տրամաբանությամբ է նաեւ, որ քրիստոնեական մեր պատմության ընթացքում թե՛ բանական իր ամբողջության մեջ եւ թե՛ առանձին գորատեսակներն ունեցել են իրենց հովանավոր ու պահապան սուրբերը, ում առաջնորդությամբ խիզախության ու անձնուրացության վեհ գաղափարներով դաստիարակված մեր հայրերը սրբազան մարտի են դուրս եկել եւ իրենց մահով ապրեցրել շատերին: Այսօր նպատակ ունենք վերականգնելու գորատեսակների բարեխոս սուրբերի եւ մասնավորապես հրեշտակաց դասերի պահպանությանն ու բարեխոսությանը հանձնվելու ավանդույթը:

Հրեշտակների կողմից մարդկանց պահպանության գաղափարը Նոր Կտակարանում առաջինը տվել է Փրկիչը՝ իհարկե, ակնարկելով մանուկներին, իսկ արդեն Գործք Առաքելոցում հրեշտակի հովանավորությանն արժանանում է Պետրոս առաքյալը: Հրեշտակների պահպանության հայցի բազմիցս հանդիպում ենք Հայ Եկեղեցու ժամակարգության մեջ: «Զհրեշտակ խաղաղութեան պահապան անձանց մերոց» ասելով՝ խնդրում ենք, որ Տերը մեզ գորուգիշեր աներկյուղ պահի սատանայի հրեղեն նետերից:

Այս երեւույթը տեսնում ենք մակաբայեցիների շրջանում, ովքեր, իմանալով իրենց բերդի պաշարման մասին, սկսեցին աղաղակել Աստծուն, որ բարի հրեշտակ առաքի խրայելացիներին փրկելու համար: Հրեշտակի պաշտպանության են արժանանում Նաբուգոդոնոսորի գերած երեք մանուկները հնոցում այրվելիս, Դանիել մարգարեն՝ առյուծների գբում, Տիրոջ առաքյալները՝ Երուսաղեմում: Նույն փորձառությունն է առկա նաեւ շատ ու շատ սրբերի կյանքում:

Թե՛ մարդիկ եւ թե՛ հրեշտակները արարված են եւ Աստուծո կողմից կոչված են սպասավորելու նրան: Դրա վկայությունն է նաեւ այն, որ ադամորդու փրկության համար Աստծո Որդին ոչ թե հրեշտակացավ, այլ մարդացավ: Հետեւաբար, ո՞վ կհանդգնի արհամարհել ու գայթակղել Աստծո զավակներին, եթե այսչափ բարձրագույն գորությունները, ովքեր մշտապես տեսնում են երկնավոր Հորը, կյանքի են կոչվել նրանց պահպանելու ու խնամելու առաքելությամբ: Ուստի սուրբերի բարեխոսությամբ եւ հրեշտակների պահ-

պանությանը զորացած հայ զինվորը արժանի է դաստիարակվելու քրիստոնեական առաքինությունների ոգով եւ լինելու Հայրենիքի ու Հայ Եկեղեցու նվիրյալը: Մեր հայրերը հավատում էին, որ արդար ռազմիկի հոգին մահից հետո բարձրանում է Աստծո մոտ եւ դառնում հրեշտակ:

Բոլորս քաջ գիտակցում ենք, որ աշխարհի վրա դեռ շարունակվում է չարի եւ բարու, լույսի եւ խավարի հրաբորբոք մարտը, որը դեռ երկար պիտի տևի: Արարչագործության հենց սկզբում Աստված իր արարածներին՝ իր նմաններին եւ լուսեղեններին, բաժանեց բանականների՝ երկրայինի ու երկնայինի, զինվորյալների ու հաղթանակածների, որոնք տարբեր հարթություններում չարի որդիների դեմ պայքար են մղում մինչ օրս: Ինչպես Պողոս առաքյալն է ասում. «Մեր պատերազմը մարդկանց դեմ չէ, այլ երկնքի տակ գտնվող չար ոգիների եւ այս խավար աշխարհի տիրակալների»: Ուստի հանգամանքները մեզ ստիպում են մեր արդար պայքարում ավելի ու ավելի մարտունակ բանակ ունենալ, ավելի կազմակերպված ու առաջադեմ, քան երեկ ունեցածը: Չարի դեմ բարու դրամատիկ ճակատամարտը ծավալվում է ողջ տիեզերքում, Աստծո արարած տեսանելի ու անտեսանելի, ֆիզիկական ու վերգալական բոլոր ոլորտներում: Ամեն անգամ բարիք գործելիս միանում ենք լուսակիր զորաց գնդին, եւ մեր կողքին է լինում մեզ ոգեշնչող ու օժանդակող պահապան հրեշտակը, իսկ երբ մեր կամքին հակառակ կամ անգիտությամբ ենթարկվում ենք օտար ներշնչման, անձնատուր ենք լինում մեզ կործանող սատանայական գայթակղությանը ու չարիք գործում, հարում ենք խավարի անկյալ ոգիների աշխարհին:

Միրելի՛ քույրեր եւ եղբայրներ ի Քրիստոս, Աստվածաշունչը մի շարք դրվագներ է ներկայացնում, որոնցում հրեշտակները ոչ միայն պահպանում են Աստծու սիրելիներին, այլեւ սպանում են ու ոչնչացնում Տիրոջ կամքին ու ծրագրին հակառակվողներին եւ կամ նրա ժողովրդին նեղողներին:

Եւ քանի որ մեր բանակն ու զորքը այսօր հրեշտակների օրինակով ու կարգապետությամբ եւ որոշակի գործառնություններով հանձն է առել ամենքիս պաշպանությունը, մեր աղոթքն է առ Աստված, որ հրեշտակային զորքերն ու Բարձրյալի ամենավերկիչ աջը միշտ սատար լինեն հայոց Բանակին ու հայ զինվորին՝ անառիկ պահելու Հայոց աշխարհի սահմանները:

Մեր աղոթքն է առ Աստված, որ մարտի դաշտում եւ անկայուն խաղաղության ընթացքում թշնամու դավադիր գնդակից ընկած հայ զինվորների շիրիմներին երկնային խաղաղությունն իջնի: Թող նրանց լուսավոր հոգիները Ուրիել հրեշտակապետն ուղեկցի աստվածատեսության: Վիրավոր զինվորին թող Ռաֆայել հրեշտակապետն Աստծո բժշկությունը հասցնի: Իսկ Միքայել հրեշտակապետը հաղթություն պարգևի նրա բազկին:

Մեր աղոթքն է, որ Գաբրիել հրեշտակապետն ավետի մեր ազգի նոր սերունդի ծնունդը, ում երակներում խտացած կլինեն նախնյաց ավանդը, մար-

տիկի ոգին, հավատի լույսը, ով կապրի ոչ թե հարաբերական, այլ ավագ եղբայրների կողմից կերտված կայուն խաղաղության պայմաններում, նորի ու լուսավորի հանդեպ լցված լավատես ակնկալիքով:

Բոլորիս միասնական աղոթքով թող երկնավոր գորքերի բարեխոսությունն ու պահպանությունը միշտ լինի մեր երկրավոր գորքի հետ: Թող Տիրոջ առատ օրհնությունը լինի մեր բանակը կազմող յուրաքանչյուր անձի՝ ամենախոնարհ աստիճանից մինչև ամենաբարձրը, այսօր եւ հավիտյանս հավիտենից, ամեն: